



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu : Marsu 2011

Edisaun : 18 Marsu 2011

JSMP lansa Relatóriu Tolu konabá Setór Justisa iha Timór Léste

Iha loron 18 Marsu 2011 JSMP sei lansa relatóriu tolu konabá “Observasaun Jéral ba Setór Justisa Durante Periodu 2010, Relatóriu Analiza Krítiku ba Enkuadramentu Jurídika ne’ebé Proteze Vítima Violénsia Bazeia ba Jéneru iha Timór Léste no relatóriu ida tan konabá Aktividade Treinamentu no seminar/workshop sira konabá setor justisa, papel autoridade judisial no asesu ba sistema justisa formal ba Autoridade Komunitariu, Jovetude, Polísia, no Estudante sira. Relatóriu ne’e sei lansa iha Edifisiu JSMP, Rua Setubal Kolmera Dili.

Diretór Ezekutivu JSMP, Luis de Oliveira haktuir katak JSMP rekoñese katak tinan 2010 nu’udar tinan ida ne’ebé produtivu iha aspetu balun, tanbá tribunal no instituisaun judisiriu sira konsegue maneija atu ultra-pasa dezafiu oi-oïn hodi rezolve kazu boot no sensetivu sira ne’ebé akontese durante tinan 2006 no tinan 2008 nia laran. Tanbá ne’e, relatóriu hirak ne’e lansa ohin loron atu hatudu progresu ne’ebé tribunal sira atinze no dezafiu sira ne’e tribunal enfrenta durante halao sira nia kna’ar.

Relatóriu tolu ne’e nu’udar referensia konprehensiva no substansiál ba públiku Timór Léste konabá faktu ka realidade setór justisa nian durante tinan 2010 nia laran.

Iha relatóriu “Observasaun Jéral ba Setór Justisa nian sei elabora no subliña pontu krítiku balun iha setór judisiáriu inklui observa dezemvolvimentu/progresu no dezafiu ne’ebé setór ne’e atinze no enfrenta iha periodu 2010 nia laran. Relatóriu ne’e hatudu faktu sira ne’ebé akontese durante periodu tinan 2010.

JSMP hanoin katak tinan 2010 nu’udar tinan ho sentidu ne’ebé bo’ot ba sistema judisiáriu iha Timór Léste. Tanbá iha tinan 2010 nia laran, iha kazu importante balun ne’ebé prosesa no konklui ona iha Tribunal. Pur-ezemplu Kazu 11 FEVEREIRU 2008, Kazu Atake ba Rezidencia Taur Matan Ruak, no Kazu Fatu Ahi. Iha aspetu lejislativu nian, iha mós lei importante ne’ebé promulga hanesan Lei Kontra Violénsia Doméstika no esbosu lei ne’ebé iha prosesu hakerek nia laran, hanesan; esbosu Lei Justisa Juvenil, esbosu Lei Apoiu Judisiáriu no esbosu Lei Kódigu Sivil. Relatóriu ne’e mós, subliña kestaun sira ne’ebé hamósu debate nakloke konabá asuntu indultu ne’ebé partensia ba direitu prerogrativu Prezidente da República. Mesmu nune’e, relatóriu ne’e mós sei tau kestaun ba asuntus balun no eziji konsistensia husi autoridade ka instituisaun relevantes no elementu sira ne’ebé partisipa iha prosesu justisa atu kumpri sira nia obrigasaun tuir prinsipiu sira ne’ebé kongsagra iha Konstituisaun, Lei Internasionál no lei aplikavel sira seluk.

Aleinde ne’e, iha relatóriu konabá Analiza Krítiku ba Enkuadramentu Jurídika ne’ebé Proteze Vítima Violénsia Bazeia ba Jéneru iha Timór Léste, sei elabora kadru juridiku Timór Léste ne’ebé governa asuntu violénsia bazeia ba jéneru, dezafiu iha nivel prátika, no rekomendasaun prátika ba instituisaun relevante sira atu mellora iha futuro. Tuir JSMP, relatóriu ne’e, sei sai hanesan referensia substantivu ida tan iha setór justisa no ba públiku, tanbá relatóriu ne’e hatudu faktu konkreta konabá fetu nia esperiensia iha sistema justisa

formal, liu husi estudu kazu tolu ne'ebé mai husi esperiensiia prátika Unidade VSS durante halo servisu apoiu legál ba vítima sira.

Relatóriu ne'e, rekoñese katak agora dadaun relativamente Timór Léste iha enkudramentu juridika ida ne'ebé komprehensiva atu regula no proteze vítima violénsia bazeia ba jéneru, maibe iha prátika, vítima sira sei enfrenta dezafiu oi-oin atu goja sira nian direitu. Tanbá ne'e relatóriu ne'e formula ho Titlu: *Protesaun Legál ba Vítima Sira Violénsia Bazeia ba Jenéru: Lei Seidauk FoJustisa.*

Nune'e mós iha relatóriu seluk ne'ebé koalia konabá aktividade treinamentu no divulgasaun informasaun JSMP nian ba Autoridade Komunitariu, Joventude, Polísia, no Estudante sira nu'udar relatóriu informativu ida ne'ebé observa públiku ninia koñesementu no oinsa públiku ninia oponiaun konabá setór justisa, asesu fetu ba setór justisa inklui papel autoridade lokal no grupu xave sira seluk iha kontestu hametin protesau no apoiu ba vítima violénsia bazeia ba jéneru iha kada nivel prosesuál hotu-hotu.

JSMP fiar katak relatóriu tolu ne'e hamutuk sei sai nu'udar referensia komprehensiva ida ba públiku Timór Léste iha setór justisa nian ne'ebé produz durante tinan 2010 nia laran.

JSMP hein katak iha tinan 2011 nia laran no tinan sira tuir mai, ema hotu-hotu sei kontinua halo esforsu hotu ne'ebé posivel hodi investe ba setór justisa nu'udar pilar importante ida iha konseitu vida Estada-de-Direitu Demokratiku nia laran.

JSMP mós hakarak agradese ba ema hotu ne'ebé halo servisu maka-as durante tinan 2010 atu asegura direitu ba ema hotu no hahi ass prinsipiu Estada de Direitu de Demokratika nu'udar prinsipiu no baze ba governasaun Estada Timór Léste. Ba oportunidade ida ne'e, partikularmente hakarak agradese ba instituisaun doadores sira hanesan USAID, The Asia Foundation, Justice Facility, The Royal Norwegian Embassy Jakarta no Misereor husi Alemaña. Aleinde ne'e, JSMP mós hakarak agredese ba instituisaun judisiariu sira hotu, hanesan Tribunál Distritais, Prokurador Distritais, Defensoria Públiku, no Advogado Privado sira, polisia VPU, nomós Oficial de Justisa sira ne'ebé mak fo ona sira nia apoiu ba JSMP hodi bele finaliza relatóriu ida ne'e. Ita boot sira hotu nia kolaborasaun no apoiu sei aprisia ass tebes no sei fo impaktu ne'ebé signifikativu tebes hodi hari setór justisa ida ne'ebé forte atu asegura ema hotu nia direitu tuir lei haruka.

Relatóriu tolu ne'e sei disponive iha lian tolu, Tetum Inglés no Indonezia.

Atu hetan informasaun ne'ebé klean liu favor kontaktu:

Luis de Oliveira Sampaio

Direitur Ezekutivu JSMP

Tlf: 3323883

Email: Luis@jsmp.minihub.org